

**Акафист Пресвятой Богородице
перед Ея иконой,
именуемой Донская**

Празднование 18 августа/1 сентября



Кондак 1

Взбранней Воеводе победительная, яко избавльшеся от злых, благодарственная восписуем Ти раби Твои, Богородице, но, яко имущая державу непобедимую, от всяких нас бед свободи, да зовем Ти:

Радуйся, Владычице, иконою Твою Донскою в напастех нам помогающая.

Икос 1

Архангела благовестие слышавши, Пречистая соизволи воле Господа Своего и со смирением сердца отвеща: «Се, Раба Господня, буди Мне по глаголу твоему». Мы же, дивящиеся, како Сын Божий Сын Девы бывает, со Гавриилом Благодатную песньми почтим:

Радуйся, Отроквице, от всех родов Богоизбранная; радуйся, скиние, Духом Святым осененная. Радуйся, живоносная обитель Света Божественного; радуйся, Мати Божия, Спаса миру рождшая. Радуйся, яко Тобою, Благодатная, Невидимый нам видим бысть; радуйся, Всепетая, яко сотвори Ти величие Сильный. Радуйся, яко прославлением икон Твоих величие сие возвещается; радуйся, благодать и милость чудотворными иконами Твоими нам являющая.

Радуйся, Владычице, иконою Твою Донскою в напастех нам помогающая.

Кондак 2

Видяще Тя, Богородице, во объятиях Младенца Христа держащую и главою к пречистому лицу Его кротце приникшую, разумеваем Божественную любовь Твою и непрестанное о мире ходатайство. В шуйце же держиши плат чистый, еже слезы плачущих скоро осушати, да никтоже от Тебе неутешен изыдет. Веруем, яко имаши велие дерзновение ко благосердию Владыки, и Богу, давшему нам Тебе, Благую Заступницу, благодарственно поим: Аллилуия.

Икос 2

Разум немощный не может постигнуть глубину смиренного служения Твоего, Госпоже, на земли Искупителю нашему, не имевшему, где главу подклонити. Во дни уничижения и страдания Сына Твоего, Богомати, оружие смертное преходжаše сердце Твое. Сего ради сердцем сболезнующе, глаголем Ти таковая:

Радуйся, незлобивая Агнице, вертеп и ясли смиренно приявшая; радуйся, Богоприимца Симеона скорбное проречение в сердце начертавшая. Радуйся, поношению Сына Божия сострадавшая; радуйся, крестный путь Его слезами оросившая. Радуйся, муки Его крестных сердцем разделившая; радуйся, Кресту предстоянием послушание воле

Отца явившая. Радуйся, гробу Сына Твоего благосердый плач принесшая; радуйся, Воскресением Его обрадованная.

Радуйся, Владычице, иконою Твою Донскою в напастех нам помогающая.

Кондак 3

Сила Вышняго содела Тя, Благодатная, источник неоскудевающ утешения бедствующим. Многи бо скорби претерпевши, можеши и искушаемым помохи. Людем российским, луте страждущим от нашествия агарян, благоволила еси явити образ Твой в струях реки Дона в знамение милости Твоей ко Отечеству нашему, в защиту от враг видимых и невидимых, тех же помохию Божию побеждающе, Спасителю Богу поим: Аллилуйя.

Икос 3

Имуще Тя первую подвигоположницу, шествующую по стопам Владыки Христа, мужества исполняхуся первосвятительство Московстии и подвижницы благочестия Российской, беды и напасти претерпевающе, учаще люди духом Господеви работати, ибо сила Божия в немохи совершается. Мы же, видяще веру отец наших и явление благодати, нравы злых в добрыя претворившия, достойно Тя, наставницу верных, ублажаем:

Радуйся, насаждение веры и благочестия; радуйся, образе несокрушимаго скорбей терпения. Радуйся, доблести и веры богатство неистощимое; радуйся, духа уныния и боязни отгнание. Радуйся, духа разума и крепости стяжение; радуйся, святых печальников земли Российской возрашившая. Радуйся, в струях Донских чудно икону Твою явившую; радуйся, реки слез народных ею изсушившая.

Радуйся, Владычице, иконою Твою Донскою в напастех нам помогающая.

Кондак 4

Буря превеликаго нашествия агарянскаго потрясе землю Русскую, но не возможе угасити пламень веры в покров Твой, Богомати Пречистая. Великий печальник наш Преподобный Сергий, призвав на помощь Святую Троицу и Тя, Владычице, со упованиею благослови великаго князя Димитрия с дружиною поход противу агарян и прорече ему: «Победиши враги твоя», темже научи всех пети Всесильному Богу, в Троице славимому: Аллилуйя.

Икос 4

Видя икону Богоматере, на поле браны от Донских предел пришедшию, и, прияв от рук иноков послание Сергия Преподобнаго с напутием: «Да

поможет ти Бог и Святая Богородица», возрадовася князь Димитрий, яко Сама Владычица грядет на супостаты, и, воспрянув духом, с надеждею поведе воины своя на тьмочисленныя полчища и победу одержа. Икона же Твоя, Владычице, молниеносным блистанием зрака Твоего враги устрашающи, залог победы являше. Сего ради благодарственно и радостно поем Ти похвальная сия:

Радуйся, в явлении иконы Твоей лучами Солнца Правды верных осиявшая; радуйся, Небесная Воевода, Мати Господа Сил. Радуйся, воинов-иноков на подвиг ратный избравшая и укрепившая; радуйся, Отечество наше от ига агарянского свободившая. Радуйся, воином мужества неодолимаго дарование; радуйся, врага исконнаго грозное низвержение. Радуйся, преславную победу православно Тя чтущим даровавшая; радуйся, земли Руссия от века Покров и Помощнице.

Радуйся, Владычице, иконою Твою Донскою в напастех нам помогающая.

Кондак 5

Богоявленною звездою возсия икона Твоя пресветлая, озаряющи утро брани и возвещающи благословение Божие ратоборцем, на брань жестокую с агаряны подвигшимся. Весь день той предстояще Сергий Преподобный с братиею неотступно Престолу Святыя Троицы. Вечеру уже бывшу, победу старец духом познав, о сем радостно провозгласи и благодарственное пение соверши Всещедрому Богу, призываю и нас велегласно воспети Ему: Аллилуия.

Икос 5

Видя очами веры течение битвы и молитвою ратоборцы укрепляя поименно поминаше Преподобный Сергий вожди и воины убиенных. Мы же, имуще завет его память о таковех особо творити и видяще силу молитвы, победу оружию приносящия, из глубины сердца воззовем Божией Матери, всемощней покровительнице душу свою полагающих за други своя:

Радуйся, воинов непреоборимая спборнице; радуйся, меч гнева Божия смелым вручающая. Радуйся, из терния злостраданий венец победы соплетающая; радуйся, во бранех силу духа даже до подвига возвышающая. Радуйся, болящих и ранами уязвленных не оставляющая; радуйся, убиенных на поле брани к вечному покою управляющая. Радуйся, родителей и вдовиц скорбящих благодатное утешение; радуйся, Воеводо изрядная, имущая державу непобедимую.

Радуйся, Владычице, иконою Твою Донскою в напастех нам помогающая.

Кондак 6

Провозвестник спасения Москвы от внезапного нашествия агарянского явися образ Твой, Заступнице скорая. Неприятелем во град внити уже готовым, с верою и слезным молением обнесоша его людие по стенам и стогнам града и поставиша посреде воев в походной церковице Сергия Преподобного, и, в молитве прилежаще, усердно взываху Всемилостивому Спасу: Аллилуия.

Икос 6

Возсиявшу солнцу, узреша стрегущии воини, яко опусте стан агарян: нощию страх внезапу нападе на ня от некия велия силы и, смутившеся, бежаша неудержимо даже за пределы Российской и вси изгибоша. О, предивная Заступнице наша! Твоими молитвами скорое избавление сие бысть. Да исполнится же древний храм сей, возвысиыйся на месте, идеже стояше чудотворный образ Донский, гласа хвалы сея:

Радуйся, града Москвы страже неусыпающий; радуйся, миротворца князя Даниила начало величию Москвы положити сподобившая. Радуйся, молитвами святителей и Сергия Преподобного град наш ограждающая; радуйся, в день скорби плач верных в радость претворяющая. Радуйся, коварного врага внезапным бегством истребившая; радуйся, упование на помощь Твою не посрамившая. Радуйся, свеще неугасимая, веры огнь воспламеняющая; радуйся, Благодатная, яко Тобою с нами Бог.

Радуйся, Владычице, иконою Твою Донскою в напастех нам помогающая.

Кондак 7

Восхотевши оградити Русь православную, державная Покровительнице наша, многажды козни агарян и прочих иноплеменник разоряше, пределы страны нашея хранящи, и победы обильныя даже без крове подаваше. Егда же Великую и Малую Россию возсоединитися благословила еси, тем силу Отечества в единении народа нашего, в союзе любве утвердила еси. Благоволи, о Мати Божия, в мире глубоце вселенную сохранити, Тебе бо дадеся благодать всемирного заступления пред Владыкою всех, Егоже воинства Небесная славят, поюще Ему: Аллилуия.

Икос 7

Нового стража неусыпного града Москвы достойно почтити хотяще, соборный храм людие благочестивии в Донстей обители соорудиша и на стенах храма воздвигоша изображение иконы Твоей, Богомати, в божественное ограждение страны нашея, яко да отъинуде находящии врази отражени будут неотступными молитвами Твоими. Тебе же, яко

сущей с нами, со упнованием глаголем:

Радуйся, Божиаго Храме одушевленный; радуйся, Боголюбивая, страну Российскую достоянием Своим избравшая. Радуйся, нощных бдений и пений молебных скорое слышание; радуйся, икону Твою, яко знамя побед неотъемлемое, даровавшая. Радуйся, прекращением браней мир и радость приносящая; радуйся, доброе пристанище душам, ищущим спасения. Радуйся, Мати мира, смятений волны укрощающая; радуйся, града Москвы и страны наша всемощная Предстательнице.

Радуйся, Владычице, иконою Твою Донскою в напастех нам помогающая.

Кондак 8

Рассеяшася тучи напастей молитвами Твоими, Заступнице Всеблагая, теплая заря покаяния, восходящи, предваряет токи благодати, призывающи к подвигу: веровати право и жити свято. Простри же покров Твой, о Благодатная Мати, на всех грядущих тернистым, но вожделенным путем Христовых заповедей, да вси познают, яко с нами Бог, Ему же поем: Аллилуйя.

Икос 8

Весь мир зле страждет грех ради человеческих, во зло его повергающих. В Тебе, Мати рода христианского, начало общаго избавления, исполнение всякия добродетели. Яви же нам, Богомудрая Дево, в Евангелии Сына Твоего свет божественный, да, отвергше горечь греха, сладость благочестия обрящем, взывающе Ти сицевая:

Радуйся, благодати Живоносный Источниче; радуйся, Еюже мира всего дивное преображение. Радуйся, Всеблаженная, ходящая в законе Господни непорочно; радуйся, слезами покаяния орошающая нас благодатно. Радуйся, молитве сердечней научивающая; радуйся, подвигу поста вспомоществующая. Радуйся, греховныя помыслы властно отгоняющая; радуйся, братолюбием темную злобу побеждати повелевающая.

Радуйся, Владычице, иконою Твою Донскою в напастех нам помогающая.

Кондак 9

Всех немощных крепoste, печальных утешение, страждущих посещение, верных дерзновение Ты еси, Пречистая Владычице Богородице; всех притекающих под сень Креста Господня ко спасению приводиши, да последуют Искупителю Богу, поюще песнь: Аллилуйя.

Икос 9

Ветии многовещании не могут исчести, Человеколюбивая Мати, бездну щедрот Твоих, на злостраждущия и беспомощныя изливаемых. И мы, сладость утешения в нуждах познавше, благословляем Тя с верою и чествуем с любвию, моления возносяще пред образом Твоим сицевая:

Радуйся, безмолвие дивное в скорбех земных показавшая; радуйся, скорбящих и плачущих отрадо и утешение. Радуйся, болящих милосердая целительнице; радуйся, долгонедужных сладости райская тайное приобщение. Радуйся, страждущих любвию близких окружающая; радуйся, вдов и сирот незримая питательнице. Радуйся, яко паче жемчуга слезами радости икона Твоя украшается; радуйся, Отечеству нашему победы обильныя дарующая.

Радуйся, Владычице, иконою Твою Донскою в напастех нам помогающая.

Кондак 10

Спасти хотя мир, Сын Божий из Тебе, Дево, плотию облечеся, и благодатию Его падшее естество человеческое, грехом оскверненное, очищение и спасение приемлет. Дивное Божие смотрение о нас Тобою, Дево, содействием Святаго Духа исполняется. Яко Ты еси воистину погибших Взыскание и нераскаянных грешников к покаянию теплому увещание, и Тобою от отчаяния греховнаго избавляеми, дерзаем с веселием пети Искупителю Богу: Аллилуия.

Икос 10

Стена еси несокрушимая Церкве Христовы, Всенепорочная Дево, верныя бо во искушениих укрепляеши и миром и любвию ограждаеши. Сего ради и вздыхания молитвенная не умолкают зовущих Ти:

Радуйся, от купели Крещения Благая Восприемнице; радуйся, супругов благословенною любвию венчание. Радуйся, матерем многотрудным изрядная помощнице; радуйся, чад непокоривых твердая наставница. Радуйся, в сиротстве дивное утешение; радуйся, враждующих нечаемое примирение. Радуйся, беззаконнующих светом правды обличающая; радуйся, грехи наша в мори милосердия растворяющая.

Радуйся, Владычице, иконою Твою Донскою в напастех нам помогающая.

Кондак 11

Пение всеумиленное приносим Ти, вместившей Ипостасное Слово Божие. Агнец Божий сый, вземляй грех мира, Той закалается еже датися во вкушение верным. Сподоби же нас, Мати Божия, достойно причащатися Пречистых Тела и Крове Его, да, спасение улучивше,

воспоеи Жизнодавцу Богу: Аллилуия.

Икос 11

Дщи Отца Небеснаго, Мати Сына Божия, Невесто Духа Святаго, неисчерпаемое море даров Божественных Ты еси, Всесвятая Дево. Умоли Человеколюбца Господа открыти нам источник всеоживляющия благодати, да очищенным сердцем потщимся возрастити плоды Духа, в радости и веселии зовуще Ти:

Радуйся, плодов Духа Святаго всецелое стяжение; радуйся, радостию духовною насыщение пречудное. Радуйся, мира непоколебимаго дарование благонадежное; радуйся, благости любвеобильныя исполнение. Радуйся, милосердия о Христе насаждение неувядаемое; радуйся, веры живыя утверждение несокрушимое. Радуйся, кротости незлобивыя наставнице несравненная; радуйся, средостение вражды разрушившая.

Радуйся, Владычице, иконою Твою Донскою в напастех нам помогающая.

Кондак 12

Благодатную помошь многажды являла еси, Царице Небесная, чрез чудотворный образ Твой Донский, егда смерть вскоре предстояше людем. Сего ради на обратней стране иконы сея древния изображено есть и всечестное Успение Твое, да всяк, подвизающийся во славу Бога и на благо ближняго, не убоится смерти, но, взирая, како Твоя душа приемлется в руце Бога Живаго, с надеждею предает себе в час смертный Судии всех Богу, вопия Ему: Аллилуия.

Икос 12

Поющие Тя, в молитвах неусыпающую Богородицу, Святей Троице предстоящую, вопием Ти: пробуди нас светом живоноснаго Успения Твоего от смертоноснаго сна нерадения о спасении души и испроси нам с Господом примирения. Егда же приспеет жатва смертная житию нашему, огради нас всесильным предстательством Твоим от духов злобы, да, Тобою водими, достигнем Царствия Небеснаго, идже незаходимое Солнце правды невечерний Свет славы божественныя изливает. О Всесвятая Дево, от Херувим воспеваемая, приими от нас, недостойных, похвалы сия:

Радуйся, обрадованная, во успении Твоем нас не оставляющая; радуйся, Мати всепетая, одесную Бога предстоящая. Радуйся, горняго мира боголепная красота; радуйся, кладезю богомыслия неисчерпаемый. Радуйся, любве Божественныя светильниче неугасаемый; радуйся, греховных уз скорая решительнице. Радуйся, воздушных мытарств прохождение неоскудное; радуйся, благая вратарница, двери райских

верным отверзающая.

Радуйся, Владычице, иконою Твою Донскую в напастех нам помогающая.

Кондак 13

О Всемилостивая Владычице Богородице, Российская страны дивная заступнице, обидимых прибежище, грешных спасение! Отечество наше от враг защити, вселенную всю миром благослови, веру православную укрепи, скорби и крест со упнованием понести помози, в любви и согласии всех нас соблюди и в радость Господа внити сподоби поющих ему: Аллилуйя.

(Этот кондак читается трижды, затем икос 1 и кондак 1)

Молитва

О, Пресвятая Владычице, Дево Богородице, заступнице наша благая и скорая! Воспеваю Ти все благодарственная за чудная дела Твоя. Песнословим от лет древних неотъемлемое заступление Твое граду Москве и стране нашей, чудотворным образом Твоим Донским всегда являемое: в бегство обращаются полки чуждих, грады и веши невредими сохраняются, людие же от лютыя смерти избавляются. Осушаются очи слезящия, умолкают стенания верных, плач в радость общую претворяется. Буди и нам, Пречистая Богородице, утешение в бедствиях, возрождение надежды, образ мужества, источник милости и в скорбных обстояниях неистощимое терпение нам даруй. Подаждь коемуждо по прошению и нужде его: младенцы воспитай, юныя уцеломудри и страху Божию научи, унывающие ободри и немощную старость поддержи. Посети в болезнях и печалех сущия, злые сердца умягчи, братолюбие укрепи, мира и любви всех нас исполни. Примири, благосердая Мати, враждующия и оправдай оклеветанныя. Истреби пороки, да не восходят грехи наша пред Судиею всяческих, да не постигнет нас праведный гнев Божий. Твоими молитвами, всемощным Твоим покровом огради нас от нашествий вражиих, от глада, губительства, огня, меча и всякаго иного злострадания. Уповаю молитвами Твоими получить от Всевышняго Бога грехов прощение и изглаждение и с Богом примирение. Умоли стяжати нам Царствие Небесное и по скончании жизни нашей одесную Престола Божия стати, идже Ты, о Всепетая Дево, Святей Троице в вечней славе предстоиши. Удостой и нас с лики Ангелов и святых тамо восхвалити пречестное Имя Сына Твоего со Безначальным Его Отцем и Всесвятым и Благим и Животворящим Его Духом во веки веков. Аминь.